

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN, FORMACIÓN PROFESIONAL E UNIVERSIDADES E O CONSORCIO INTERUNIVERSITARIO DO SISTEMA UNIVERSITARIO DE GALICIA (CISUG) PARA A POSTA EN MARCHA DUN PROXECTO DE ANÁLISE BIBLIOMÉTRICO NO SISTEMA UNIVERSITARIO DE GALICIA (SUG) E A ELABORACIÓN DO PLAN DIRECTOR DO CISUG

Santiago de Compostela

COMPARECEN

Román Rodríguez González, conselleiro de Cultura, Educación, Formación Profesional e Universidades, nomeado mediante o Decreto 60/2022, do 15 de maio (DOG núm. 94 do 16 de maio), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Antonio López Díaz, reitor magnífico da Universidade de Santiago de Compostela (USC), nomeado mediante o Decreto 35/2022, do 17 de marzo (DOG núm. 56, do 22 de marzo), actuando en representación do Consorcio Interuniversitario do Sistema Universitario de Galicia (CISUG), CIF Q1500428F e domicilio no Edificio Fontán, 1º Andar, Cidade da Cultura de Santiago de Compostela, en calidade de presidente do mesmo no momento da sinatura deste Convenio, segundo se establece nos artigos 10 e 12.2 dos Estatutos do Consorcio Interuniversitario do Sistema Universitario de Galicia (DOG núm. 111, do 12 de xuño de 2018).



Interveñen en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- As universidades do Sistema Universitario de Galicia (SUG), Universidade da Coruña (UDC), Universidade de Santiago de Compostela (USC) e a Universidade de Vigo (UVIGO), son entidades que forman parte do sector público institucional que, xunto coa misión docente, realizan actividades de investigación e desenvolvemento científico e tecnolóxico, o que as configura coma un dos principais axentes xeradores de coñecemento en Galicia.

Que as universidades do SUG teñen como un dos seus obxectivos a busca da calidade científica e a materialización da transferencia tecnolóxica a partir de resultados científicos para a mellora do sistema económico e o benestar da sociedade galega, contando para isto con infraestruturas científico-tecnolóxicas e capital humano, claves para acadar esta calidade.

SEGUNDO.- Ao abeiro da Lei 6/2013, do 13 de xuño, do Sistema Universitario de Galicia, artigo 66, e da Lei 40/2015, do 1 de outubro, de réxime xurídico do sector público, con data do 28 de maio de 2018 asinouse un convenio de colaboración entre a Xunta de Galicia, a través da Consellería de Cultura, Educación e Ordenación Universitaria e as tres Universidades do SUG para a creación do Consorcio Interuniversitario do Sistema Universitario de Galicia (CISUG), xunto cos seus estatutos (publicado por Resolución do 1 de xuño de 2018 no DOG núm. 111 do 12 de xuño). Segundo establece o artigo 2 dos Estatutos, o CISUG estará adscrito á Universidade de Santiago de Compostela.



TERCEIRO.- Coa creación desta figura xurídica CISUG as universidades acordaron a colaboración mutua en calquera área de xestión agregando os recursos de cada unha delas, homoxeneizando os procesos e facilitando o intercambio de información. Deste xeito, preténdese xestionar elementos de forma integrada aforrando custos, fomentando a colaboración e proporcionando maior transparencia e unha información rápida, auténtica e de calidade no Sistema Universitario de Galicia.

CUARTO.- O CISUG ten como obxectivo (artigo 3 do seus estatutos) a cooperación organizativa, económica, técnica e administrativa do SUG, para acadar unha maior calidade e eficiencia das universidades que o constitúen.

Para a realización do seu obxecto, as entidades consorciadas colaborarán nos fins e funcións do CISUG (artigo 4 dos seus estatutos), entre os que se atopan:

- *Desenvolvemento de proxectos colaborativos que redunden nunha maior eficiencia, eficacia ou consecución de fins de interese común do Sistema Universitario de Galicia, ben con fondos propios dos membros do Consorcio ou con achegas de calquera outra entidade pública ou privada nacional ou internacional con que se considere de interese colaborar.*
- *Nos desenvolvementos informáticos e procedimentais, que poderán abranguer a xestión académica, a xestión da investigación, a xestión económica, sistemas de información, dirección e impulso da administración electrónica e unificación da información derivada destes procesos.*
- *Adquisición, de xeito centralizado, de ferramentas informáticas, material científico ou bibliográfico ou calquera outra subministración ou servizo que comporte aforro para o conxunto do Sistema Universitario de Galicia.*

QUINTO.- A Bibliometría, como ciencia que mide a actividade investigadora e pode predicir a tendencia da mesma, é necesario facela visible dentro das



universidades ao obxecto de que se poida informar sobre a avaliación e prospectiva baseada na produción científica dun entorno específico.

Os traballos de Bibliometría tiveron un acomodo moi eficaz nas bibliotecas universitarias nos últimos anos; un paso máis cara a autonomía informativa é desenvolverlos como un nexo de información e procedementos entre un conxunto de universidades dentro dun paraugas como pode ser un ente creado para mellorar a eficiencia dos seus recursos.

SEXTO.- A definición dun Plan director para o CISUG está motivada nas vantaxes que supón dispoñer dunha folla de ruta que defina as grandes liñas de planificación e xestión do Consorcio, que recolla aspectos básicos de actuación, interacción ou cooperación entre as tres universidades para alcanzar obxectivos que lles son comúns, co obxectivo final de fomentar a calidade e excelencia no SUG.

SÉTIMO.- A Secretaría Xeral de Universidades, de acordo coas competencias que lle outorgou o Decreto 119/2022, do 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades é o órgano superior da Administración xeral da Comunidade Autónoma de Galicia para a ordenación, planificación e execución das competencias en materia de universidades e ensinanza universitarias correspondentes a esta consellería. Mais concretamente, e segundo dispón o artigo 12.1.d) correspóndelle a promoción e xestión eficiente e integradora dos recursos e capacidades de investigación do Sistema Universitario de Galicia para a súa posta en valor no marco do Sistema de innovación e, particularmente, a promoción da coordinación das universidades galegas no establecemento de programas, infraestruturas e actuacións en materia de investigación.

Por conseguinte, as partes abaixo asinantes acordan subscribir o presente convenio, que se rexerá polas seguintes



CLÁUSULAS

PRIMEIRA.- Obxecto do convenio e actuacións a levar a cabo

O obxecto deste convenio é establecer as condicións polas que se rexerá a colaboración entre a Consellería de Cultura, Educación, Formación Profesional e Universidades e o Consorcio Interuniversitario do Sistema Universitario de Galicia (CISUG) para o financiamento de actuacións para o desenvolvemento dun Proxecto de Análise Bibliométrico que sirva para dar servizo ás universidades do SUG e que se desenvolverá dende o CISUG, así como a elaboración do Plan director do CISUG.

Trátase, por unha banda, de coordinar, impulsar e normalizar a produción científica do SUG e a súa evolución; e, por outra banda, a través do desenvolvemento do Plan director, dar visibilidade ás potencialidades do CISUG como instrumento *ad hoc* para canalizar as políticas colaborativas das tres universidades do SUG.

Estes obxectivos preténdense acadar a través de:

- Contratación de licenzas de bases de datos de análise bibliométrico, como *Scival* e *Incites*, para persoal das tres universidades do SUG, a Secretaría Xeral de Universidades da Consellería de Cultura, Educación, Formación Profesional e Universidades e o CISUG.
- Creación dun grupo de traballo para levar a cabo tarefas de asesoramento especializado, contraste e validación dos informes.
- Apoio técnico da *spin-off* da Universidade de Granada, Ec3metrics SL, que é, na actualidade, altamente especializada na elaboración de informes bibliométricos e referente na avaliación da ciencia e da comunicación científica en España.



A integración da información recollida, relativa á produción científica do SUG, será posible mediante a implementación de metodoloxías baseadas en técnicas bibliométricas aplicadas a tal efecto.

- Traballos de elaboración do Plan director do CISUG.

SEGUNDA.- Contía da axuda

A contía da axuda e a súa distribución por anualidades é a seguinte:

Accións	2022	2023	2024	Total
Licenzas acceso Bases Datos Análise Bibliométrico	171.809,11	176.962,50	182.271,98	531.043,59
Apoio técnico	44.649,00	44.649,00	44.649,00	133.947,00
Formación específica Bibliometría	5.000,00	5.000,00	5.000,00	15.000,00
Plan director CISUG	30.000,00	0,00	0,00	30.000,00
Total	251.458,11	226.611,50	231.920,98	709.990,59

A dotación para este convenio é de 709.990,59 € con cargo á aplicación orzamentaria 10.20.561B.744.1 (2022 00063) no marco do Plan galego de financiamento universitario 2022-2026 (aprobado polo Acordo do Consello da Xunta de Galicia do 16 de decembro de 2021, DOG número 248, do 28 de decembro).

Esta cantidade de 709.990,59 € trátase dun importe certo, e queda por conta da parte beneficiaria a diferenza de financiamento necesario para a total execución da actividade subvencionada, debendo ser reintegrado ao financiamento público unicamente no caso e polo importe que supere o custo total e real da actividade.

A axuda é compatible con outras concedidas para o mesmo fin, pero en ningún caso, o importe da subvención achegada pola consellería poderá ser de tal contía que, illada ou en concorrencia con outras subvencións, supere o custo da actividade subvencionada, tal como se establece no artigo 17.3 da Lei 9/2007, do 13 de xuño, de subvencións de Galicia.



TERCEIRA.- Compromiso das partes e obrigas

De acordo coa lexislación vixente, as partes comprométense:

A Consellería de Cultura, Educación, Formación Profesional e Universidades comprométese a colaborar co CISUG no financiamento das accións para o desenvolvemento dun Proxecto de Análise Bibliométrico no SUG, así como dos traballos para a elaboración do Plan director do CISUG.

O CISUG comprométese a levar a cabo as actuacións segundo reflexa a memoria dos proxectos obxecto deste convenio e o estipulado nas cláusulas primeira e segunda, coa finalidade de coordinar, impulsar e normalizar a produción científica do SUG e, ademais, visualizar as potencialidades do CISUG como instrumento para canalizar as políticas colaborativas das tres universidades.

De conformidade co artigo 31.7 da Lei 9/2007, do 13 de xuño, de subvencións de Galicia, e de acordo co establecido no artigo 11.e) do Decreto 11/2009, do 8 de xaneiro, polo que se aproba o Regulamento da Lei 9/2007 de subvencións de Galicia, a obriga de presentar a certificación do cumprimento de obrigas coa Administración pública da Comunidade Autónoma, coa Administración do Estado e coa Seguridade Social substituírse por unha declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración.

CUARTA.- Fórmula de pagamento

O pagamento realizarase contra a presentación, antes do 30 de novembro de cada ano de vixencia do convenio, por parte do CISUG, dunha memoria na que se dea conta do destino da achega e da certificación expedida polo órgano de control correspondente do CISUG na que se dá toma de razón en contabilidade



da achega. Especificarase o cumprimento da finalidade do presente convenio e que os fondos foron destinados a este fin, así como o detalle da realización dos pagamentos.

Así mesmo, deberase presentar unha declaración responsable de estar ao día no cumprimento das obrigas tributarias ou fronte á Seguridade Social e de non ter débedas coas administracións, así como unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.

QUINTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian desenvolver as actividades e a consellería, de tal xeito que non se lle pode esixir responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

SEXTA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, crearase unha comisión mixta constituída do seguinte modo:

- Dous membros da Secretaría Xeral de Universidades, dos que un actuará como presidente.
- Dous membros do CISUG.

A dita comisión actuará como órgano de vixilancia, seguimento e control do establecido neste convenio, e promoverá, se o considera conveniente, outras actuacións que poidan enriquecer o seu desenvolvemento.



Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida, serán resoltas pola Consellería de Cultura, Educación, Formación Profesional e Universidades.

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 47 e seguintes da Lei 40/2015, do 1 de outubro, de réxime xurídico do sector público.

De acordo co establecido no artigo 53 da dita Lei este convenio deberá ser remitido ao Consello de Contas nos termos que no mesmo se establecen.

SÉTIMA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, o CISUG consente expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

As reservas que puideran facer no sentido de non autorizar a obtención dos datos ou á publicidade destes nos rexistros, que en todo caso terán que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

As partes asinantes deste convenio manifestan o seu consentimento para que os datos persoais que consten no mesmo, así como o resto das especificacións contidas no mesmo, poidan ser publicados no Portal de Transparencia e



Goberno Aberto.

As subvencións estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno e de acordo co indicado na actual redacción do artigo 20 da Lei 38/2003, de 17 de novembro, xeral de subvencións, a información correspondente ao presente convenio publicarase na Base de Datos Nacional de Subvencións.

OITAVA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, este convenio ten un interese público dado que é preciso dar resposta ás necesidades do persoal docente e do persoal investigador do SUG de ter acceso á produción científica, nunha visión de conxunto, das universidades. Esta acción esténdese ás tres universidades galegas como integrantes do CISUG para fomentar as súas potencialidades, a xestión compartida dos contidos, acceso, distribución e recursos da produción científica das mesmas, non sendo necesario, polo tanto, promover a concorrència competitiva.

Este convenio de colaboración ten a natureza dos previstos no artigo 6 da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, e



realízase ao amparo do establecido nos artigos 47 e seguintes da Lei 40/2015, do 1 de outubro, de réxime xurídico do sector público, rexéndose polo establecido nas súas cláusulas e polo establecido na Lei 9/2007, do 13 de xuño, de subvencións de Galicia e o seu regulamento, aprobado polo Decreto 11/2009, do 8 de xaneiro.

De acordo co disposto na comunicación da comisión sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención contemplada neste convenio non constitúe axuda de Estado nos termos do artigo 107 do Tratado de funcionamento da Unión Europea ao tratarse de financiamento público de actividades non económicas como instrumento axeitado para dar resposta a obxectivos e fins de interese común, en particular, neste caso a través do CISUG, a coordinación e cooperación, como elemento relacional básico para a racionalización do mapa universitario e o fortalecemento do conxunto das universidades galegas respectando a identidade de cada unha delas (artigo 2.1.c da Lei 6/2013, do 13 de xuño, do Sistema Universitario de Galicia).

Non obstante o CISUG deberá garantir que as actividades derivadas deste convenio se axustan ás normas procedimentais e materiais vixentes no momento da concesión da axuda, debendo informar á consellería por medio da comisión de seguimento.

NOVENA.- Vixencia do convenio

O presente convenio entrará en vigor coa sinatura dixital do último dos asinantes, sen prexuízo de que poida atender accións realizadas desde o 1 de xaneiro de 2022 e terá vixencia ata o 31 de decembro de 2024.

Non obstante o establecido no apartado anterior, este convenio poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dalgunha delas, o que se comunicará



fidedignamente, logo de audiencia desta e con, polo menos, un mes de antelación. En calquera destes casos procederase á revogación das axudas, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

Lido por todas as partes, por si mesmas, e como proba de conformidade co expresado no presente convenio, asínano dixitalmente.

Román Rodríguez González
Conselleiro de Cultura, Educación, Formación Profesional e Universidades

Antonio López Díaz
Reitor da Universidade de Santiago (USC) e Presidente do Consorcio Interuniversitario do Sistema Universitario de Galicia (CISUG)

